



Inatsisartuni ilaasortaq Malik Berthelsen  
c/o Inatsisartut Allattoqarfia  
/Maani

### § 36 naapertorlugu apeqquteqaammut 2010-214-imut akissuteqaat

Inatsisartuni ilaasortaq Malik Berthelsen (Siumut) ulloq 14. oktober 2010 § 36 naapertorlugu Naalakkersuisunut apeqquteqarpoq, kinaluunniit qinigassanngortissinnaanermik piumasaqaatinik naammassinnissimasoq danskisut kalaallisullu oqalussinaanngitsaq qinikkatut sulinaruni oqaatsit suut atussanera qanorlu piumaffigineqassanersoq.

Inatsisartut nammineerlutik sulinerminni malittarisassatik aalajangersartarpaat, malittarisassallu atuuttut Inatsisartut Naalakkersuisullu pillugit Inatsisartut inatsisaanni kiisalu Kalaallit Nunaanni Inatsisartut Suleriaasianni aalajangersarneqarsimapput.

Malittarisassat maannakkut atuuttut naapertorlugit Inatsisartuni isumaqatigiinniarnit kalaallisut ingerlanneqarnissaat aalajangersarneqarsimavoq, taassumali saniatigut danskisut aamma malinnaaffigineqarsinnaassallutik. Inatsisartuni ilaasortaq danskisuinnaq oqaaseqartuuppat, isumaqatigiinniarnit kalaallisut aamma malinnaaffigineqarsinnaassapput.

Kinesereq, amerikkarmioq, franskeq sumiuqaluarnersorluunniit alla malittarisassat maanna atuuttut naapertorlugit Inatsisartut oqaluttarfiannit oqaatsit suut atorlugit oqalussanersoq pillugu apeqqummut akissut tassaavoq, pineqartoq kalaallisut danskisulluunniit oqalussinnaasoq. Ilisimaneqartut Inatsisartuni ilaasortanik kineserisuinnaq, tuluttuinnag franskisuinnaq oqaaseqartoqanngimmat, apeqqut tamanna annertunerusumik maannakkut pisunut attuumassuteqarpallaanngilaq.

Oqaatigineqareersutut Inatsisartut nammineerlutik malittarisassatik imminnut atuuttut aalajangersartarpaat, taakkununga ilanngullugu oqaatsit sorliit oqaluttarfimmi atorneqassanersut. Taamaattumik kineserisut, tuluttut franskisulluunniit Inatsisartuni oqalunnissaq pisariaqalissagaluarpat, Inatsisartut nammineerluinnarlutik oqaatsit suut atorneqassanersut aalajangersarsinnaavaat.

Naggasiullugu apeqqutigineqarpoq, Aningaasaqarnermut Ataatsimiititaliami siulittaasup ima oqaaseqarnera, Naalakkersuisut qanoq isumaqarfigineraat: "Oqaloqatigiit akornanni oqaaseqatigiikkaanni oqaloqatigiinneq ajornannginnerusarpoq, kalaallisullu oqaluttut allassinnaasullu amerlisaraanni piffissarujussuarmik aningaasarpassuarnillu sipaartoqarsinnaavoq."

Oqaaseqatigiit akornanni oqaloqatigiinnerup ajornannginnerusarnera assortorneqarsinnaanngitsumik ilumoorpoq. Taamatuttaaq oqaluttaanermut nutserinermullu aningaasartuutit matumani pineqarpata, taava aningaasat siparneqarsinnaanerat ilimanartorujussuuvoq.

27. oktober 2010  
Suliap normua 2010-040499  
Dokumentip normua 489771

Postboks 1015  
3900 Nuuk  
Tlf. (+299) 34 50 00  
Fax (+299) 32 50 02  
E-mail: govsec@nanoq.gl  
www.nanoq.gl

Inussiarnersumik inuulluaqqusillunga

  
Kuupik Kleist